

Regional News Unit AIR Aizawl
Saturday, April 06, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Tun hnaia thlipui, rial leh ruah surin Mizorama chhiatna a thlen hriat theih chinah mi pakhat a thi a, 5 an hliam a, ran vulh lai pakhat a thih bakah In 2,646 a chhia.
- MPSC Chairman Pu JC Ramthanga'n MPSC-in Exam kalphung, dan mumal tak, dik leh rintlak a neih thu leh tun hnaia MPSC hlutna tihnam thei zawnga hmalakna awm chu tha lo a tih thu a sawi.
- Election Commission of India chuan vantlang auhmun (social media) lama vote thlak khawl nuaih 15 a bo anga thuthang thehdarh chu thu belhchian dawl lo a nih thu a sawi.
- Israel sipaite chuan Gaza-a tanpui hna thawktu mi 7 thihna avangin senior officer 2 an ban.

<><><>

DISASTER

Tun hnaia thlipui, rial leh ruah surin Mizorama chhiatna a thlen hriat theih chinah mi pakhat a thi a, 5 an hliam a, ran vulh lai pakhat a thih bakah In 2,646 a tichhia.

Disaster Management and Rehabilitation Director Pu Benjamin Lalzama'n Akashvani Aizawl a hrilh dan chuan, thlipui leh ruahpuiin a nuai avanga thing tluin Pi Malsawmtluangi kum 45, Aizawl Bungkawn venga cheng chu a delh hlum a. Aizawl district-ah hliam 5 awmin an zinga mi pakhat chu State Referral Hospital Falkawnah enkawl mek a ni a. Aizawl district-ah vek ran vulh lai thi pakhat a awm bawk. Building chhia 2,646 zinga 335 hi thli, ruah leh rialin a tihchhiat vek a ni a, a dang 2,311-te chu chhe nasa leh a then chauh chhiate a ni hlawm. Kolasib district-in thlipui, rial leh ruah hi an tuar nasa ber a. In chhe vek 176 a awm a, a vaia chhia ni lo 655 a awm bawk. Aizawl district-in dawtin in chhe vek 74 leh a then chauh chhia in 561 a awm a. Lawngtlai district-ah in chhe vek 5 chauh a awm laiin a then chauh chhia 366 a awm thung.

Heng khuarel chhiatna lo thleng avang hian Mizoram sawrkar leh a kaihnawih Department te chuan rang taka hma lain an ngaihven nghal a. Thawhtanni khan DM&R Minister Pu K. Sapdanga hovin Secretary DM&R, Director DM&R leh Officer ten inkhawm hmanhmawh kovin chhiatna lo thleng chungchanga hma lak dan tur leh chhawmdawlina chungchang ngaihtuah nghal a ni a. Nilaini khan Chief Secretary hovin hma lak dan tur ngaihtuah turin a kaihnawih Department hrang hrang te inkoh khawm a ni a, Secretary DM&R-ho leh Director DM&R ho te pawhin Officer leh hnathawk dangte an thukhawm thin bawk.

District tina bawrsap ruat Zonal Officer te'n a hmunah chhiatna lo thlen dan te an enfiah nghal zel bawk a. District tina DEOC atangin SEOC-ah englai pawhin report pek reng a ni bawk. District tina DC leh DDMA te'n an district theuhah SDRF (Response & Relief/Recovery & Reconstruction) fund an kawh sa theuh atangin hmanhmawh takin a theih ang angin chhiatna tawkte hnenah tanpuina an pe chhuak mek zel a. DM&R Aizawl atang leh DDMA thenkhat ten in chhe thawmthat nan rangva leh silpauline te an pe bawk.

Tunah hian sawrkar hotute leh Department kaihnhawih hotute hmalaknain chhiatna tuarte chhawmdawl nan SDRF sum atanga hmanhmawh taka rangva leh silpauline lei nghal tura tih a nih angin rang taka order siam nghal a ni a. Rangva hi engemawzat lo thleng tawhin a vawikhatna atan Aizawl District tan nimin khan sem chhuah tura ruahmanna siam nghal a ni a. Rangva leh silpauline dang te pawh lo thleng thuai tura beisei a ni.

SDRF sum pawh hi hmanhmawh thilah dil belh nghal a ni a, rang takin sawrkar leh department hotuten bawhzuiin nimin khan engemawzat Finance Department atangin hmuh nghal a ni a, vawiin hian district zawng zawng DC leh DDMA-ah an mamawh zual puhruk ngei thei turin pek chhuah nghal vek beisei a ni. Heng SDRF sum an pek chhuahte atang hian SDRF danin a phalsak ang chin zelah DC/DDMA te hian an bial chhunga chhiatna tawkte tan tanpuina an pe chhuak zel dawn a. Tanpuina atan hian In chhia, thlai chhia, ran thi leh mihring thi leh hliam te awm dan DDMA tin ten uluk taka enfiaha chhut chhuakin a theih ang anga tanpui zel an nih dawn thu Director chuan a sawi a ni.

<><><>

MPSC

MPSC Chairman Pu JC Ramthanga'n MPSC-in Exam kalphung, dan mumal tak, dik leh rintlak a neih thu leh tunhnaia MPSC hlutna tihnam thei zawnga hmalakna awm chu tha lo a tih thu a sawi.

MPSC Chairman hian nimina chanchinbumite a kawmnaah an hun chhungin exam kalphung an siam tha nasa hle a, state danga an tih dan Mizorama hman tangkai theih tur zir tur an intir thin, a ti a. Ziak loha kalphung tihdan hmasa te ziakin dah a ni a, hna chu a tam thei ang khaikhawmin hmalakna tam tak an kalpui niin a sawi a. MPSC chu nasa taka thuam chak zawk an ngai a, tunah pawh hmasawna tam tak a awm tawh tih sawiin thawktu an neih belh zel, a ti a. Mizoram sawrkarin mawhphurhna a pek chu tha taka hlen chhuah an tum tih a sawi bawk.

MPSC hotute sawi danin Answer sheet-a nawhreh leh siamthat awm thin chu tunhma atanga an kalpui tawh thin a ni an ti a, exam chhanna endiktu chu chhawng hrang hrang an siam a, MPSC-in written exam an neiha zawhna chhanna endik dan chu Evaluation chhawng 3-in uluk taka en thin niin hemi chhawng 3 a kal tlang hma loh chuan written result tihchhuah a ni ngai lo an ti a. Scrutinizer-in an tihfel tawh hnuah MPSC-in a tidanglam tawh ngai lo tih sawiin MPSC exam buaipuitute chhungkhat hnaivai an exam dawnah in-report thlapin an chhungte and exam dawn chuan confidential paper an khawih thei lo, an ti a; engkim dik tak leh fair taka kalpui thin a ni, an ti bawk. MPSC thuneitute sawi danin MCS Combined exam 2023 chungchang hian Gauhati High Court, Aizawl Bench-ah Writ Petition thehluh a ni a, MPSC laka thehluh chungchang chu ngaihtuah turin Court-ah a awm mek, an ti bawk.

Nimin chanchinbumite a kawmnaah MZP-in tunhnaia MPSC exam buatsaih fel fai lo awm chungchanga bang tura an phutah ban a tum leh tum loh MPSC Chairman hian a sawi lang lo.

<><><>

SCHOOLS RE-OPEN

Mizoram sorkar hnuaia school hrang hrang te chuan nimin atang khan kum 2024-2025 Academic session atan school an lut ãan.

School Education Director Pu Lalsangliana chuan school kai ãan ni-ah hian zirlaite leh zirtirtute duhsakna a hlan a. Session hmasaa an lo tih angin NEP 2020 angin zirlai lut tharte'n school kal nuam an tih theih na'n Vidya Pravesh kalpui chhonzawm a nih thu sawiin zirna chu ram hmasawmna hnukpui ber a ni, a ti a. Director chuan sikul zawng zawng theihtawp chhuah theuh turin duhsakna a hlan a, Session hmasa atanga an lo kalpui tan tawh sawrkar enkawl school-a zirlai naupang ten uniform inang hak chu chhonzawm a la ni a, thlak danglam a la awm lo a ti bawk.

Kuminah hian zirlaibu chhut zawh hman loh vanga indaihlohna a awm dawn lo ni-a thudawn a ni a, school uniform lam pawh school tinin an peih fel thawkhat hman ni-a hriat a ni bawk.

<><><>

CAR RENTAL

Adviser to CM Pu TBC Lalvenchhunga'n All Mizoram Car Rental Association ten an puhna chungchangah Dan hmanga hma lak a nih dawn thu a sawi.

Adviser to Chief Minister, (Finance leh Planning changtu) Pu TBC Lalvenchhunga hian All Mizoram Car Rental Association ten an puhna - Lok Sabha inthlan lo awm tura Election Official Duty-te tana Car Rental hman a nih chungchangah thuneihna dik lo taka hmang leh mimal hamthatna atana hmang anga an puhna chu ngawih bopui chi nia a hriat loh thu a sawi a. Dik lo taka inpuhna leh intihmingchhiatna a awm nia sawiin hemi chungchangah hian dan anga hma lak a tum a, tun hnua tu chungah mah thleng tawh lo se tih thuchhuah siamin a sawi a ni.

All Mizoram Car Rental Association hi Ningani zan khan thukhawmin, Parliament inthlan awm chho meka rental car hman chungchangah Adviser to CM Pu TBC Lalvenchhunga chu thuneihna hmang sualah puhin bang turin an phut a. Mizoram sawrkar an hrawn tawh zingah election official te tana rental car hman chungchangah tun hmain thil fel lo a la awm ngai lo tih sawiin an buaina tawh chu a rang thei ang bera chinfel ni se an duh thu an sawi a ni.

Car Rental Association sawi danin tuna Lok Sabha inthlan lo awm tura election official duty te tana car rental hman a nih chungchangah an pawl member-te motor chu hman a ni lova. An member ni duh lo TBC Car Rental te chauh koh an ni chu an hrethiam lo tih an sawi a. TBC Car Rental neitu Pu TBC Lalthantluanga'n a unaupa, Adviser to CM Pu TBC Lalvenchhunga thuneihna dik lo taka ama mimal hamthatna atana a hmang chu pawl an tih thu sawiin an resolution chu Chief Minister hnenah leh Transport Minister hnenah an thehluat a, an ngenna chu April ni 10 ral hma ngei a tih hlawhtlin an phut a, an tih hlawhtlin loh chuan hma an la zel dawn tih an sawi a ni.

<><><>

ECI TERMS FALSE CLAIM OF MESSAGES BEING CIRCULATED ON WHATSAPP THAT 15 LAKH EVMS ARE MISSING

Election Commission of India (ECI) chuan vantlang auhmun (social media) WhatsApp lama vote thlak khawl (EVM) nuaih 15 a bo anga thuthang thehdarh chu thu belhchian dawl lo a nih thu a sawi.

ECI chuan he thu thang hi mite rilru hruaikawi thei leh thu dik lo a ni a ti a. Vote thlak khawl pakhatmah bo a awm loh thu leh Supreme Court pawhin Vote thlak khawl bo ni-awma sawi chungchanga thu an dawn pawh a hnawl thu ECI chuan a sawi bawk. ECI chuan hriattirna rintlak hre tura an official website luh theih reng a nih thu a sawi bawk.

<><><>

VP JAGDEEP DHANKHAR ADDRESSES VALEDICTORY CEREMONY OF IAS OFFICER TRAINEES IN UTTARAKHAND

Vice President Jagdeep Dhankhar chuan nimin khan Mussoorie, Uttarakhand-a Lal Bahadur Shastri National Academy of Administration-ah kum 2023 batch IAS Officer Training-te thlahna hunah thu a sawi a.

Officer training-te chu ram leh hnam nghahfak an nih anga mipuite rawngbawlna kawnga mi chungchuang, felfai leh rintlak ni turin a chah a a ni.

Citizenship Amendment Act chungchang sawichhuakin Vice President chuan, he dan hian tu khua leh tui nihna mah a chhuhsak lova, amaherawhchu, thenawm rama hnam tlem zawk leh sakhaw tenau betute tan kawng a sialsak zawk a ni a ti a. Chutih rual chuan he dan hian India rama rawn pem lut huk tura insawmna a kaw k lo a ni a ti bawk.

<><><>

DELHI COURT RESERVES ORDER ON CM KEJRIWAL'S PLEA SEEKING MORE TIME WITH LAWYER

Delhi Chief Minister Arvind Kejriwal-a'n a dan hremite nena kar khata tum 2 an inhmu thei vawi 5-a tipung tura a dilna chu Delhi court chuan a kheh rih.

Rouse Avenue Court-a Special Judge Kaveri Baweja chuan hemi chungchanga thupek chu April ni 9-a chhuah tur a nih thu a sawi.

Delhi Chief Minister hi dan lova sum tihchingpena puhna chungchangah Court chuan thawhtanni khan April ni 15 thleng atan Jail-ah a khung a ni.

<><><>

ISRAEL FIRES TWO OFFICERS AFTER FINDING GRAVE ERRORS IN STRIKE ON AID WORKERS

Israel military chuan boruak lam atanga Gaza an beihnaa chawmdawl hnathawktu mi 7 Gaza-a cham mekte an thi tel kha tihdan phung zawm lohna lian tak a ni tiin a mawhpurtu sipai senior officer 2 an ban.

Israel sipaite chuan an chhuichianna atanga an hmuh danin an sipaite chuan Hamas-a chhawmdawl hna thawktu World Central Kitchen pawl chu thawhtan zan khan Hamas silai keng ni ngeia ngaiin an lirthei chu an bei palh a ni an ti a. An tihpalh thil pawl runthlak tak a nih thu an sawi a ni.

<><><>